



Suliffissaqartitsineq aalisarnermillu inuussutissarsiteqarneq patajaallisarniarlugit qanoq iliorluta suliffissuit puttasut tunitsiviullutillu tunisassiorfiusut siuarsarnissaat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Jens Immanuelson, Siumut)

Demokraatini qujassutigaarput manna periarfissaq atorlugu nunatta aaqqissuussaana oqaaseqarfigisinnaagatsigu.

Tungaviummik Demokraatini isumaqarpugut siunnersuuteqartup ajornartorsiutit ilumoortut aaqinneqartariaqartulu arlallit tikkuarmagit. Qanorli iluarsiiissanerluta immaqqa isumaqatigiinngissutigissavarput. Isumaqarpugut naalagaaffiup suliassarinnigikkaa aalisakkerivinnik ingerlatsinissaq. Isumaqarpugut naalagaaffiup suliassarinnigikkaa aalajangissallugu sumi aalisakkeriveqassanersoq aamma sumi umiarsuarnik tunitsiviliisoqassanersoq. Isumaqarpugut suliffissuup tamanna aalajangigassarigaa, naalakkersuisut pinnatik.

Assersuutigalugu akerlaraarput isumaqartoqarmat nunamut iluaqutaassasoq sapinngisamik annerpaamik nunami aalisakkanik tunisassiorortoqarpat. Taama isumaqarnerput erseqqissarniarlugi innersuussutigisinnaavagut suliffissuaqarfimmeersut kisitsit. Naatsorsuinerit takutippaat akileraarutit suugaluartulluunniit tamaasa, innaallagissamut imermullu tapiissutit allallu tamaasa katikkaanni taava nunami suliffik ataaseq agguaqatigiisillugu Namminersorlutik Oqartussanut ukiut 900.000 koruuninik aningaasartuutaasarpoq. Tassa imaappoq aalisartunut aalajangigassannortittuugaluarsigut aalisakkat qaqqit qanoq tunisassiaralugit suliarineqassanersut aamma sumut tunineqassanersut, taava landskarsimut isertitat amerleriaataat atorlugit inuit marluk assersuutigalugu isumaginninnerup iluani atorfinitsissinnaagaluarpagut.

Taamaattumik aalisarnermik inuussutissarsiornerup qilersungaanninnerusumik aaqqissuunneqarnissaa angorusupparput. Aalisartut iluaquserneqassapput aamma Landskarsi iluaquserneqassaaq taamaalillunilu aamma Kalaallit Nunaat.

Taamatut oqarluta qujavugut oqallinnermut soqutiginarumut.